

NOTISCIA DE FUMU

Che niedda notiscia 'e fumu  
- brazzos iscarridos abbertos a su chelu -  
si pesat reu su cherclu.

Drommit in s'altura  
sa tristura iscorzada 'e su suerzu.

Gighen duru su coro  
sos montes ispilidos;  
raighinas disisperadas  
buttat su granitu.

Eremitas senza piantu,  
serrados in funtanas de pedra,  
ticchirrian penas seculares;  
bèlidas no tasset sa laghinza,  
né suspiros dan sas launeddas.

S'olidone mudat in lamentu  
su mudine de su 'entu  
cun dun'abbrazzu senza tempus  
a su nieddore.

Addaisequs de unu mureddu,  
attesu,  
un'arvure 'e limone,  
isganzat tristu unu risittu.

"Ranzigore"

MONDINA SECHI

SASSARI